



# Gutpela Wasman

No 1/2018

**Jisas Krai i tok,  
“Mi gutpela wasman  
bilong sipsip.”**

Jon 10.11

**Bilip strong na prea bai God inap harim**

**Bilip bilong liklik Sendi**

Wanpela liklik gel i winim 5-pela krismas pinis. Nem bilong em Sendi.

Olgeta Sande em i save amamas long go long Sandeskul. Wanpela taim mama bilong em i painim bikpela sik tru.

Na em i no inap long wokabout moa. Sori tru, ol i kisim em raun long wil sia (wheel chair).

Taim ol i go long haus sik dokta i sekim em na tok, em i gat tripela kain sik i stap long bodi bilong

em na em i mas slip long haus sik na kisim marasin. Papa i go bek long haus na tokim Sendi long sik bilong mama. Sori, aiwara i pulap long ai bilong Sendi tasol em i tokim papa olsem, “Mi bilip Jisas bai helpim sik bilong mama na ol dokta bai rausim mama long haus sik na mama bai i kam bek long haus gen.” Tasol papa i ting em i tok nating tasol.

Taim Sendi i stap wantaim tumbuna mama, em i save prea na askim Jisas long oraitim sik bilong mama. Long wanpela Mande moning papa i laik go lukim mama long haus sik. Liklik Sendi i prea pinis na tokim papa olsem, “Papa nau mi bilip dokta bai rausim mama long haus sik na yutupela wantaim bai kam long haus.” Nau papa i tingim tok Sendi i bin mekim bipo.

Long dispela taim long haus sik, dokta i sekim mama na i tok olsem, “Bikpela i helpim na oraitim olgeta sik bilong yu pinis. Yu ken go long haus nau.” Taim



papa i go kamap long haus sik mama i tokim papa olsem. “Ol dokta i tok olgeta sik bilong mi i pinis na mi ken go bek long haus nau.” Na tupela wantaim i kam bek long haus nau.

Taim mama i kam long haus, Sendi i amamas tru na ran i go holimpas mama na tok olsem, “Mama, Jisas helpim yu pinis a?” Na mama i bekim olsem, “Yes, oltaim mi pilim wanpela man i stap long baksait taim mi sindaun na long taim mi slip long haus sik bet.” Na Sendi i tokim mama, “Mi save prea long yu olsem na Jisas i was long yu. Em i gutpela wasman.”

Yes, yumi lukim prea na bilip bilong liklik Sendi i mekim Jisas i oraitim sik bilong mama. Ol Kristen pikinini i mas bilip strong na prea bai God inap long ansaim prea. Prea long papa, mama, brata, susa, bubu na ol arapela long famili i sik. Na yu askim Bikpela long ol arapela samting yu sot o laikim bai God inap long givim long yu olsem Jeremaia 33.3 i tok, “Singaut long mi na bai mi bekim beten bilong yu.” Sapos wanpela long famili bilong yu i no tanim bel yet, orait askim Jisas i ken helpim em long tanim bel na kamap Kristen.

***“Na sapos yupela i bilip na mekim prea, orait olgeta samting yupela i beten long kisim, em bai yupela i kisim.” Matyu 21.22***

John Nombriil (EBC Kugark)

## Prea bilong stretpela pikinini i gat strong

Tupela liklik Sandeskul pikinini i save stap long wanpela ples long Mondomil seket. Yumi laik givim nem Boito na Mandu long tupela. Olgeta Sande tupela i save laik long go long Sandeskul na kolim Baibelves, singim ol song, prea na harim ol Baibel stori Sandeskul tisa i save autim.



Wanpela taim liklik gel Mandu i lusim ki bilong haus insait long rum bilong en na em i kam aut pinis na i lokim dua. Mandu i lus tingting long karim ki wantaim em i kam ausait. Em i pret nogut tru long wanem, tupela papamama i no save lotu na tupela i save mekim kain kain toktok na bai tupela i paitim em.

Tupela pikinini gel na boi i sindaun klostu tru long haus dua na liklik gel i bilip strong long God na em i prea olsem, “Papa God inap yu bringim ki i kam klostu tru long dua na mi ken kisim.” Taim em i prea pinis na tok amen, em i lukim ki i stap klostu long haus dua na em i kisim. Mandu i opim dua wantaim amamas na i go insait long haus na tok bikpela tenkyu long Papa God long helpim bilong em.

Ps Francis King (EBC Banz seket)

## God inap harim prea bilong ol liklik pikinini

Liklik boi Yanona i winim tupela krismas. Wanpela taim em wantaim papamama bilong em i laik go na visitim ol bubu lain bilong en na ol i go long Kainantu na slip long taun. Taim ol i go kamap long haus bilong bubu bilong en, bubu mama i wok long givim kaikai long ol pikinini kakaruk bilong en na sampela ol i dai na em i wok long tromoi ol i go ausait long haus kakaruk. Yanona i lukim wanpela pikinini kakaruk i laik i dai na em i holim long tupela han na i go insait long haus paia bilong bubu we sampela arapela manmeri tu i stap. Yanona i wokabout isi isi na i go sanap arere long paia ples na i tokim olgeta manmeri i stap insait long haus long pasim ai na em i laik prea long dispela pikinini kakaruk.



Tasol olgeta i kirap na i lap long em. Sampela i tok, “Liklik boi, nogut bai yu pundaun long paia. Yu go longwe na kisim kakaruk bilong yu i

go tromoi long rabis hul.” Tasol boi i sanap long tok bilong em na i laik prea na i tok, “Mama, mi laik prea long kakaruk ya. Sandeskul tisa i bin tokim mipela olsem, Wanpela liklik pikinini i no save mekim tok nogut, orait Jisas i save harim prea bilong em.” Orait bihain olgeta i lukluk i stap na em i statim prea bilong em. “Jisas, Sande mi go long Sandeskul na tisa i tok, Jisas i save harim beten bilong mipela pikinini i

no save tok nogut, stil, pait, kros, sakim tok na belhat. Yu ken oraitim dispela pikinini kakaruk na em i ken wokabout i go nau, Amen.” Olaman, kwik taim tumas dispela pikinini kakaruk i kirap na i laik flai i go tasol em i holim strong na i tok, “Mama lukim pikinini kakaruk i laik flai i go nau.” Na mama wantaim bubu na olgeta i kirap nogut taim ol i lukim dispela samting.

Mama wantaim bubu bilong Yanona i tok, “Dispela kakaruk bai mi lukautim bilong yu na taim em kamap bikpela, orait bai mi singautim yu na bai yu kam kilim na kaikai.”



Tru tumas, God i save harim prea bilong ol liklik pikinini tu. Jems 5.16 i tok olsem,

*“Na yupela wan wan i mas prea long God i helpim ol arapela, na bai God i mekim yupela i kamap orait gen. Sapos stretpela man i prea, orait prea bilong en i gat bikpela strong, na em inap tru long helpim ol arapela.”*

Pikinini, sapos yu bilip na prea olsem Yanona i prea, God bai i harim prea bilong yu. No ken ting olsem God i save harim prea bilong ol bikpela lain tasol. Nogat. Em i save harim prea bilong ol liklik pikinini olsem yumi tu.

Rex Ame (Seket Komperi)


# Painim Aut!!

Aninit i gat tupela wok yu mas mekim. Wok A na B. Ritim gut ol tok na bihaininim.


Kisim wanpela kala na kalaim olgeta O,  
kisim narapela kala na kalaim olgeta hap  
i gat X. Wanem tok i stap hait bai i kamap  
ples klia.

Joinim ol dot wantaim namba na bai  
yu painim aut piksa i mekim wanem  
samting. Stat long namba wan i go  
inap long las namba 46

A



B



"Na sapos yupela i bilip na:  
mekim prea, orait olgeta  
samting yupela i beten  
long kisim, em bai yupela i  
kisim." Matyu 21.22

Gutpela Wasman Tim i laik tok tenkyu long tripela brata i bin raitim stori i kam:  
John Nombriil EBC Kugark, Ps Francis King EBC Banz na Rex Ame EBC Komperi



Published and printed by:  
Publications Department  
Evangelical Brotherhood Church (Inc.)  
P.O. Box 996, Lae 411, Papua New Guinea

No 1/2018